

25 AUG 1997

Agong-Brunei

MALAYSIA DAN BRUNEI BELUM TEROKA BANYAK BIDANG

KUALA LUMPUR, 25 Ogos (Bernama) -- Masih banyak lagi bidang kerjasama baru antara Malaysia dan Brunei belum diterokai sepenuhnya terutama dalam projek pembangunan dan industri teknologi tinggi di kedua-dua negara atau usaha sama di negara ketiga.

Yang di-Pertuan Agong Tuanku Ja'afar bertitah sebagai dua negara jiran yang sedang membangun dan inginkan kemakmuran serta kesejahteraan bagi rakyatnya, peluang untuk bekerjasama dan saling bantu membantu amatlah luas.

Seri Paduka Baginda berharap semua inisiatif yang telah dikemukakan oleh pihak swasta Malaysia khususnya yang dibincangkan menerusi projek Kawasan Pertumbuhan Timur Asean - Brunei, Indonesia, Malaysia dan Filipina (BIMP-EAGA) akan diberi pertimbangan sewajarnya oleh kerajaan Brunei.

Tuanku Ja'afar bertitah demikian pada majlis santapan malam meraikan lawatan negara Sultan Brunei, Sultan Hassanal Bolkihah di Istana Negara, di sini.

Turut berangkat Raja Permaisuri Agong Tuanku Najihah dan isteri-isteri Sultan Brunei, Raja Isteri Pengiran Anak Hajah Saleha dan Pengiran Isteri Hajah Mariam.

Hadir sama Perdana Menteri Datuk Seri Dr Mahathir Mohamad dan Datin Seri Dr Siti Hasmah Mohd Ali.

Tuanku Ja'afar bertitah Malaysia dan Brunei adalah dua anggota Asean yang berpengaruh yang dapat memainkan peranan penting ke arah mewujudkan keamanan dan kestabilan serantau.

"Usaha Malaysia dan Brunei akan memberi sumbangan besar kepada pembangunan dan kemajuan Asia Tenggara seluruhnya," titah baginda.

Tuanku Ja'afar berharap kedudukan Asean sebagai organisasi serantau diperkukuhkan sejajar dengan perkembangan semasa serta matlamat bersama yang hendak ditujui.

Baginda juga percaya wawasan asal bagi mencapai matlamat Asean 10 di masa terdekat akan terkabul.

Di peringkat antarabangsa, baginda berharap Malaysia dan Brunei dapat sama-sama berganding bahu bagi meringankan bebanan penderitaan penduduk seperti di Bosnia-Herzegovina dan Palestin.

Yang di-Pertuan Agong yakin lawatan Sultan Brunei dan rombongan akan menjadi pendorong dan penggalak bagi meningkatkan hubungan kerjasama antara kedua-dua negara khususnya dalam bidang perdagangan dan kerjasama ekonomi.

Ini juga melambangkan keakraban ikatan silaturahim serta hubungan baik dan istimewa yang terjalin sejak turun temurun antara Malaysia dan Brunei berasaskan persamaan sejarah, bangsa, bahasa, agama dan budaya.

"Berlandaskan asas-asas ini dan diperkuatkan dengan azam kedua-dua negara untuk bekerjasama dalam segenap bidang, maka hubungan antara kedua-dua negara akan menjadi lebih kukuh di masa depan," titah baginda.

Yang di-Pertuan Agong turut berdoa agar hasrat murni Brunei untuk melaksanakan program pembangunan akan sentiasa memperolehi kejayaan sepenuhnya.

Menurut baginda dasar kerajaan Malaysia ialah untuk terus bekerjasama bersungguh-sungguh dan berganding bahu dalam usaha mencapai pembangunan dan kemajuan Brunei.

"Dengan adanya semangat persaudaran dan setiakawan yang tinggi, sebarang halangan yang timbul akan dapat diatasi demi kepentingan kedua-dua negara," titah baginda. --BERNAMA

MHI MAI